

CONVENIO ENTRE A AXENCIA INSTITUTO ENERXÉTICO DE GALICIA (INEGA) E A ASOCIACIÓN DE INDUSTRIAS DEL METAL Y TECNOLOGÍAS ASOCIADAS DE GALICIA (ASIME) PARA A REALIZACIÓN DE ACTIVIDADES RELACIONADAS COA ENERXÍA EÓLICA MARIÑA FLOTANTE DURANTE O ANO 2026

MEMORIA XUSTIFICATIVA

A Xerente da Axencia Instituto Enerxético de Galicia (INEGA)

DECLARA: Que esta entidade de dereito público ten previsto formalizar con ASIME, o instrumento convencional arriba referido por un período de vixencia que abrangue dende o día seguinte ao da súa sinatura e rematará o 31 de decembro de 2026.

Que o instrumento convencional ten por obxecto establecer as condicións da colaboración entre o INEGA e ASIME para a realización dun estudo de impacto da enerxía eólica mariña en Galicia así como outras actividades relacionadas co impulso de dita enerxía que se levarán a cabo mediante a avaliación e estimación das capacidades das empresas participantes.

Que o instrumento convencional que se pretende asinar se fundamenta no seguinte:

INEGA constitúese en Axencia por Decreto 142/2016, do 22 de setembro, mantendo a súa adscrición a Consellería competente en materia de enerxía, conforme ao establecido na Lei 3/1999, do 11 de marzo, e entre cuxas funcións destaca a de incidir na utilización racional da enerxía, así como diversificar as fontes enerxéticas e reducir, na medida do posible, a dependencia exterior.

Na actualidade, é necesario continuar avanzando nas novas políticas enerxéticas dentro do Marco Estratéxico de Enerxía e Clima europeo, nacional, autonómico, destacando en canto a este último a "Estratexia Galega de Cambio Climático e Enerxía 2050" e a "Axenda Enerxética de Galicia 2030", a través da posta en marcha de novas propostas que redunden na consecución de novos obxectivos enerxéticos e medioambientais establecidos como camiño cara a unha transición enerxética efectiva e co máximo aproveitamento dos principais recursos enerxéticos renovables de orixe local.

Desde o punto de vista enerxético, Galicia dispón dun dos maiores potenciais eólicos mariños do Estado, con ventos estables, unha ampla fachada atlántica e unha industria naval e portuaria capaz de asumir parte da cadea de valor asociada á fabricación, ensamblaxe e mantemento de plataformas flotantes. O desenvolvemento desta tecnoloxía podería contribuír a diversificar a matriz enerxética galega, reducir a dependencia de combustibles fósiles e avanzar cara aos obxectivos europeos de descarbonización.

En conxunto, a enerxía eólica mariña flotante representa unha oportunidade significativa para Galicia, tanto en termos enerxéticos como industriais. O seu



desenvolvemento, con todo, require unha planificación coidadosa e unha gobernanza sólida na que o Inega desempeña un papel fundamental como axente técnico, coordinador e dinamizador. A colaboración entre administracións, sector privado, comunidades costeiras e centros de investigación será determinante para que Galicia poida aproveitar plenamente o potencial desta tecnoloxía emerxente.

ASIME é unha asociación empresarial galega sen ánimo de lucro, cuxa principal finalidade é a defensa dos intereses e o beneficio común das súas empresas asociadas. A entidade representa unha capacidade de acción singular, ao agrupar a máis de 600 empresas industriais, polo que toda actividade ou iniciativa promovida por ASIME conta cun elevado grao de participación e impacto no tecido empresarial galego.

Para a xestión e defensa dos seus intereses, ASIME actúa en múltiples ámbitos, entre os que destacan o desenvolvemento e participación en proxectos de I+D+i, a colaboración con outras entidades, o fomento e impartición de accións formativas, así como a promoción e execución de iniciativas de comercio exterior orientadas á internacionalización do sector do metal galego.

É por isto que o INEGA, neste marco, e no seu obxectivo de impulsar o estudo das actuacións de coñecemento, desenvolvemento e aplicación das tecnoloxías enerxéticas renovables e a mellora do aforro e a eficiencia enerxética no actual período de transición require a colaboración de ASIME, para a realización das actividades obxecto do presente convenio, ao considerar que dispón do perfil máis axeitado como axente sectorial estratéxico que integra e representa de maneira singular ao ecosistema industrial galego vinculado á cadea de valor da eólica mariña flotante. A súa participación resulta esencial pola capacidade de agregación empresarial, interlocución sectorial, mobilización de empresas e coordinación técnica especializada que non poden ser obtidas mediante unha prestación ordinaria de servizos en réxime de mercado. As actividades a realizar van a servir de marco de referencia para a consecución dos obxectivos marcados pola "Axenda Enerxética de Galicia 2030".

Mediante este convenio o INEGA expón un marco de colaboración no que une as dúas experiencias e eidos de competencias de cadaquén para conseguir fins comúns de interese público por iso é a canle axeitada, rigorosa e segura a través da colaboración leal e profesional entre os asinantes.

Neste sentido, as actuacións previstas no convenio teñen un carácter institucional, colaborativo e de dinamización sectorial, ao estar directamente vinculadas coas funcións propias que ASIME vén desenvolvendo no ámbito da promoción industrial, internacionalización, cooperación empresarial e impulso do sector offshore galego a través do Galician Offshore Energy Group (GOE).

A colaboración prevista non responde á contratación dunha prestación concreta susceptible de licitación independente, senón á articulación dun marco estable de cooperación entre ambas entidades para a consecución de fins comúns de interese público vinculados á transición enerxética, á consolidación da cadea de valor industrial galega e ao posicionamento estratéxico de Galicia no ámbito da eólica mariña flotante.



O interese compartido no desenvolvemento da actividade supón, á súa vez, que as achegas que a Administración efectúa no seo do convenio non se dirixen a retribuír á outra parte, senón a posibilitar a acción conveniada.

O INEGA colaborará con ASIME no financiamento do desenvolvemento do obxecto do presente Convenio, cunha achega de corenta e cinco mil euros (45.000,00 €) I.V.E. engadido, con cargo a 09.A3.733A.641.1 do seu orzamento de gastos para o ano 2026, segundo o cadro seguinte:

Nº	Concepto	Importe
ACTUACIÓN ESTRATÉXICA		
1	Execución proxecto "North Value"	25.000 €
2	Estudio impacto eólica mariña en Galicia	20.000 €
TOTAL		45.000 €

No texto do convenioponse de manifesto que se van realizar actividades de interese público, social e económico, co fin de acadar os obxectivos de aforro e eficiencia enerxética, xerar volume de negocio e evitar a contaminación ambiental.

En atención ao exposto, e a fin de cumprimentar o preceptuado no artigo 15.2 da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

Santiago de Compostela, na data da sinatura dixital.
A xerente,
Silvia Cortiñas Fernández

